

草溪卞氏叅判公派世稿序

記曰先祖有美而不知是不明也知而不傳是不仁也夫不仁不明惡得爲子孫哉所謂美者何也祖宗之心法事功而行之于時垂諸後昆者是也顧不重且大矣歟惟我卞氏始以周文王裔分封於魯之卞邑因以受姓其源清而其來遠矣在唐天寶禮部尙書諱源奉命來東教以新羅詩禮其功深而其澤厚矣惟其如是故天之篤生我文烈而至於有封有諡則其德遂而其麻無窮矣自是而評理之罔僕白靖提學叅判之翊贊王家及吾卞不顯之謨而曰忠曰孝曰烈曰儒行之或旌或隱雖有事功之不同皆所以不失祖宗心法則一也有而毫忽不敢不知知而毫忽不敢不傳此世稿所以成於派譜之日而僉宗之博採精攷者也由叅判公派譜而成故他派諸公雖有美蹟不得叅書者以其簡也自文烈以下至于今日凡有美蹟之可傳者一開卷而瞭然在目伯恭家傳未必專美凡而吾宗而觀此世稿者各思其

所生則繼述之心未必不泯然而生然若知其美而不知其行傳於書而不傳於人是將與不明不仁者何以異哉知之曰明力行曰仁旣明且仁身安得以不保家安得以不成國安得以不治乎夫然後方可以傳先祖之美而無愧爲子孫之道也噫是其在於我而已可不相與勉哉

丁酉十月上浣叅判公十八代孫相泰謹序